



ATASSUT

UPA15/39-1

Steen Lyngø

19.03.2015.

Pittuffik, Thule Air Base, pillugu apeqquteqaat aallaavigalugu oqallittoqarnissaanik siunnersuut. Amerikkarmiut nunatsinniinnerannit Kalaallit Nunaat sutigut iluaquserneqassava? Aningaasatigut pissarsiassatigut qanoq piunasaqaateqassaagut, isumaqatigiissutillu sorliit isumaqatigiinniutigineqaqqinnissaannik piunasaqaateqassaagut?
(Inatsisartunut ilaasortaq Sara Olsvig, Inuit Ataqtigiiit)

Pituffik pillugu nunatsinni ataatsimut allorissaaqatigiinnissaagaluq tunulliullugu partiit ataasiakkaat naapiffeqanngitsutut naapitseriarusussuseqanngitsutullu pissusilersorfiattut naliliisariaqaratta ATASSUT-mit assut ugguaarput.

Aap, oqallisissiamut matumunnga aallarniuterput immaqa sakkortugineqarsinnaavoq.

Kisianni ATASSUT-mit isumarput naapertorlugu apeqqummut tunngatillugu naalakkersuinikkut pissusilersuutigineqartut inerisimanerusariaqarput, ataatsimoornerusariaqarput aammalu matut tamaasa qiviinnarlugit assortuuttutut pissusilersorneq tunngavigalugit inuiaqatigiittut inissinnerlunnissaq aqqutissiuunneqarpoq, ajoraluartumik!

Matumanittaaq apeqquteqaat aallaavigalugu oqallisissiami apeqqutigineqartunut tunngatillugu mianersunngikkutta, politikikkut quppap pilersinneqarsimasup suli itinerulernissaa aqqutissiuunneqarataannaavoq.

Taamaammatt ATASSUT-mit kaammattuutigissavarput aporaannerit pisuutitseqattaarnerillu unitsillugit killiffimmiit inuiaqatigiit kalaallit annerpaamik iluaqutissinneqarnissaat siunertaralugu sulineq ingerlanneqalissasoq.

ATASSUT nipangersitaasimasutut allaallu apeqqummut isummerusunngitsutut pasillerneqartarpoq, taamaattoqajannngilarli!



ATASSUT INATSISARTUNI

Nuannareqqusaarneq imminullu iluaqutissinniarnissaq ATASSUT-mit atortorinngilarput. Suliassat suulluunniit sukumiisumik suliarisarpavut, sulinitinnilu aqutissat eqqortut aqutigerusuttarpavut isumarpullu naapertorlugu periaaseq inuiaqatigiinnut iluaqutaanerpaq toqqarniartarpavut, tamanna aamma atuuppoq apeqqummut matumani pineqartumut tunngatillugu.

Qulaajaasoqarpoq, qularnanngilarlu qulaajaanerup inerneru Inatsisartuni partiinut tamanut aamma tusartinneqarumaartut, qulaajaasitsineq taanna aallaavigalugu akisussaaffimmik inissiisoqartariaqassappat, alloriarneq tiguneqarumaarpoq, taamaattorli suliat naammassineqanngitsut tunngavigalugit siumoortumik isumaliutersorneq aallaavigalugu oqallinnermut ATASSUT peqataassanngilaq.

ATASSUT-mit oqallisissiamik siunnersuuteqartumut mialersoqqussutigissavarput killiffimmiit pitsaannerusumik angusaqarnissaq anguniarneqarsimappat periuseq atorneqartoq isumaliutigilluagassaammat.

Tassami isumaqatigiissutit atuuttut allanngortinneqarnissaat kissaatigineqarpa timaluunniit isumaqatigiissutit nutaani kilaneqarnissaat kissaatigineqarpat, tamanna sioqqullugu matut tamaasa qulaaginnarlugit nunatta piunasaqaatigiunaaqai ilusilersorneqarsinnaanngillat, illuatungerisassammi neqitsersorneqaannarsinnaapput, nunarpullu sinnerlugu angusassat innarlerneqarsinnaallutik.

Taamaammat ATASSUT-mit matumani oqallisissiarineqartoq sukumiisumik akissuteqarfiginiannngilarput, periarfissarli iluatsillugu iluunngarluta kaammattuutigissavarput ataqqeqatigiilluni tatigeqatigiillunilu suleqatigiinnissaq nassaariniarneqassasoq, uivertutullu pissusilersorani isumaqatigiinniartoqaqqissappat allatulluunniit nunatsinnit piunasaqaateqartoqassappat, nunatta piunasaqaatigiunaaqai ilusilersorneqassasut.

Taakkuupput oqallisissiamut matumunnga ATASSUT-mit qisuariaatigiunaaqai.